

NOS CAROLUS 1702

Dei Gratiâ, Svecorum, Gothorum, Vandalorumq; REX, Magnus Princeps Finlandiæ, Dux Scaniæ, Esthoniæ, Livoniæ, Careliæ, Bremæ, Verdæ, Stettini, Pomeraniæ, Cassubiæ, & Wandaliæ, Princeps Rugiæ.

Dominus Ingriæ, & Wismariæ; necnon

BIBLIOTHECA
UNIV. IAGELL.
GRACOVENSIS

Comes Palatinus Rheni, Bavarici, Cæsarici, Cærviciæ, & Montium Dux.



33.07.1. III.
Notum testatumq; facimus omnibus & singulis, quorum interest, aut quomodolibet interesse poterit, quòd cum relatum est Nobis, non paucos Inclytæ Reipublicæ Polonæ Senatores, Dignitarios, Nobiles, cæterosq; Incolas, adventu Exercitus Nostri vehementer esse consternatos, utpotè quem Aula Regia Polona, Ejusq; asseclæ, falsissimis criminationibus deferunt, adco insolefcere, ut prædia Nobilium atq; Ecclesiasticorum sine discrimine diripiat, gravissima tributa extorqueat, omniaq; faciat, quæ ab hoste patrari solent; hanc autem famam constat in eum finem esse ab ijs disseminatam, ut mens Reipublicæ hisce accusationibus intenta, de primis hujus belli, quod insciâ Republicâ motum est, autoribus non cogitaret, neq; recordaretur ingentia illa mala, quæ à Rege Poloniæ Reipublicæ inflicta sunt, multo minùs illa, quæ ad evertendam Reipublicæ libertatem jam diu molitur, prævideret: Ideo nè distortæ ejusmodi calumniæ in animis Ordinum & Incolarum Regni Poloniæ invalescerent, sinistramq; de integerrimis Nostreis erga Rempublicam studijs excitarent opinionem, necessarium duximus hisce iterare illa, quæ toties ad Rempublicam scripsimus, & simul noxias Regis Poloniæ machinationes, quas Ipse cæteriç malevoli tanta anxietate celare cupiunt, omnibus in propatulo ponere. Notum enim est, quòd postquam FRIDERICVS AVGVSTVS Elector Saxonix, Diadema Polonicum per scissionem Ordinum invasisset, inductis in viscera Regni peregrinis copijs, quarum auxilio liberæ Gentis suffragia oppressit, adeoç violavit Cardinale illud libertatis Jus, quod in unius Nobilis contradicentis voce consistit: Ab illo tempore, violentum regimen continuando, omnes curas cogitationesq; in eo defixit, ut, eversâ Republicâ, absolutum Imperium acquireret. Quapropter Saxonicum militem, sine consensu Reipublicæ accersitum, non modo pertinaciter retinuit, sed etiam, ut eum in perniciem Reipublicæ aleret, Provincias Regni Poloniæ gravissimis exactionibus

& tributis subiecit. Cum iniquissimis extorsionibus fessus Ordo Equestris, Constitutione Comitiali sanxisset, ut intra spatium sex hebdomadarum exiret vastator miles, simulabat quidem se consentire, donec eidem Constitutioni eludendæ novos dolos neceretur. Interea in nullo puncto Pacta Conventa & fidem juratam Reipublicæ servavit, adimplevitq; sed omnia pro suo arbitrio & libidine, tanquam in illimitato Dominio, facere aggressus est. Legationes ad externos, Reipublicæ nomine, sed absq; ejus scientiâ & jussu misit. Fœdera cum Moscorum Czaro, infensissimo Polonis vicino, clanculum percussit, arctissimamq; amicitiam contraxit, ut ejus ope validior, Liberam Rempublicam in Dominationem converteret. Ab altera parte, ut munimenta Reipublicæ interciperentur, connivebat, varijsq; artibus annixus est, ut fundos Reipublicæ contra luculentam sanctionem, quæ Anno 1631 facta est, sui juris efficeret. Vt autem eò tectius destinata sua perficeret, Senatum in arduis negotijs, quæ ad Rempublicam pertinerent, exclusit, adhibitis è Saxonia Consiliarijs infamibusq; quibusdam, quos flagitia sua alijs Regnis expulerant. Horum perniciosis consilijs usus, nihil non attentavit, contemptâ Nobilitate Polonica, & eò quoq; adactâ, ut mancipia Saxonum adoraret. Hæc indigenis ubiq; prælata: his honores mandati: his etiam custodia corporis credita, ut fastidium erga Polonos ostenderet, & parata haberet servitutis instrumenta. Quos servitio promptissimos, & in Reipublicæ perniciem venales deprehenderat, hos extollere, cæteros premere, & odijs sævissimis persequi non destitit. Atq; ut diffidentiam inter Indigenas, & odiorum semina latius spargeret, sæpè vacantem unam dignitatem in plures simul contulit. Vnde omnia in Rep: disturbata, discordijs & dissensionibus plena, & in omnem licentiam effusa libido, cum justitiam exulare juberet, & quævis crimina impunita sineret. Nōrunt utiq; omnes, & etiamnum gement, dissidiorum, quibus Lithvania hodie ardet, fomitem ab eo accensum, Nobilesq; & Illustres Familias ab eo invicem commissas, ut, alterutram partem fovendo, omnes tandem opprimeret. Quæ adeo ei successerunt, ut partim ipsius exercitu, qui stativa in Lithvania habuerat, partim discordijs illis internecinis, ad deplorandam & abominabilem desolationem Nobilis iste Ducatus redigeretur. Ex ejusmodi machinationibus documenta capi possunt, exitiosam valde hujus Regis fuisse intentionem, nisi fortuna Reip: amica fatum avertisset. Tum quoq; Reip: Polonæ periculosum inprimis esse, illum habere Regem, quem suâ naturâ insolentem potentia propria, & opportunitas Regionum, quas Poloniæ vicinas possidet, ad vasta consilia, dominandiq; cupiditatem impellerent. Atqui non hîc immoderata hujus Regis libido substitit, quin ulterius glisceret, cum, inconsultâ Republicâ, bellum inchoaret, atq; ita certissimi summi Imperij pignus & palladium, quod in jure belli ac pacis maximè conspicitur, arriperet. Nobis enim, qui æternam cum Inclyta Republica Polona Pacem habemus, Pactis Olivenfisibus & Sanctissimo utriusq; partis jurejurando confirmatam, dolosè & sine ulla justa causa, nefaria intulit arma. Cum amicitiam quàm
maxi-

maximè simularet, oblato etiam arctiore fœdere, in media pace, cum Nos tranquillè ageremus, confisi Pactis cum Republica initis, improvise ex Lithvania irrumpens; Provincias Nostros hostiliter invasit ac devastavit; munimenta quædam ex insidijs occupavit, Commercium & Navigationem cum insigni utriusque Nationis damno & jactura sustulit; Civesque Nostros ad seditionem allexit; tracto in societatem perfido Moscorum Czaro, ut furentis instar Oceani, impetatos Nos, & nihil mali suspicantes, uno impetu obrueret attereretque. Quod Consilium ejus eò maximè tendebat, ut, occupatâ Livoniâ, dominationis arcem ibi fundaret, &, urgente ab altera parte Saxoniâ, Rempublicam Polonam quasi compede victam teneret; præsertim cum diuturno bello Turcico vires nondum collegisset. Sed cæleste Numen, quod perjuriam & injusta bella abominatur, cum Nobis, tum amicæ Gentis Polonæ propitium, destituit impias machinationes, superbamque Ducis Saxoniæ potentiam per Nos ita fregit & disjecit, ut fusus & dispersus exercitus ejus, non tantum è Nostreis, sed etiam è Reipublicæ finibus, cum magna trepidatione excederet. Ut igitur Inclyta hæc Respublica, per victricia arma Nostra, copijs Saxoniciæ jam liberata, à metu quoque Regis sibi gravissimi, eorumque insidijs, quos partim ob privatum commodum, partim ex animo Libertati Polonæ infenso, faventes sibi habet, in perpetuum liberetur; atque in pristino statu collocata, de læsionibus jurium suorum, de Pactis Conventis toties conculcatis, de improborum Civium prævaricationibus, juxta clarissimam Reip: Legem, quæ Cives jurejurando & obsequio solvit, cum Pacta Conventa à Regibus violantur, in judicium cum illo & affeclis ejus ire possit, resque suas adversus ejusmodi molimina in posterum firmare; in Poloniam Nos cum robore Exercitus Nostri intravimus, cum subnixi justissima causa & omnium Gentium jure, quod vim vi repellere sinit, hostemque ubicunque recipitur & moratur, insectari; tum pleni fiducia, ob propensissimum Nostrum erga Inclytam Rempublicam animum, obque fœdera sanctè & integrè à Nobis culta, atrocissimarum injuriarum & gravissimorum damnorum, quæ à fœdifrago Rege passi sumus, eam simul habitum iri rationem, ut, amoto omnium malorum, quæ Nostrum & Polonicum Regnum hodie affligunt, capite, satisfactio justa Nobis contingat. Neque enim, quamdiu ille Reip: præest, securitatem ullam Nobis polliceri possumus, quem tot argumentis jam experti sumus fidem & jusjurandum nihili facere, neque prius nocendi animum deponere, quam nocendi facultas ei adimatur. Tum quoque spes est, utrumque Regnum & firmiori amicitiae nexu adstringi, & pacem tranquillitatemque posse invenire. Recordabitur quoque Respublica Sangvinem Antecessorum Nostrorum in Jagellonicam domum transfusum, adque Sceptrum Inclyti hujus Regni provectum, unde jura Reipublicæ Polonæ maximam partem sunt profecta: illa Nos protegere & facta tecta conservare omnibus viribus annitemur. Hujus in Rempublicam animi & constantiae pignora nuper dedimus, cum per Comitem Konigsmarchiam, & mox Vistumium, Aulicum suum, exclusâ Republicâ, secretam Pacem Rex Poloniæ offerret. Exoticas has personas, quas

in diminutionem Illustrissimorum Legatorum, cum ingentibus promissis tacite ad Nos miserat, ne in conspectum quidem Nostrum admittere volumus, tanto minus quidquam, quod per illas potuissimus de Reip: fundis lucrari. Quapropter cum ad persequendum Regem hunc, qui, fracto dolose foedere, primum per exercitum suum Saxonicum, deinde per Oginscium & Visnovicium, hostiliter Nos aggressus est, intolerabilibusq; damnis affecit, ulterius procedere coacti sumus; presentibus hisce publice manifestamus & profitemur, quod nihil hostilitatis Reipublicæ Polonæ, aut Nobilitati, ejusdemq; bonis, juribus ac Privilegijs inferre, neq; Regnum affectare, neq; de illo decerpere quidquam, neq; aliam quampiam Personam in Regem eligendam proponere meditamur, intendimus vel cogitamus: sed ut Inclyta hæc Respublica gravi sibi suisq; juribus dominio, sese liberare, obedientiam perjuro ac foedifrago Regi renunciare, & alium, quem voluerit Regem, liberis ac concordibus suffragijs, juxta suum beneplacitum eligere, Leges & consuetudines suas de liberâ Regis Electione læsas, & alia jura sub regimine præsentis infracta restaurare, justitiam exulantem revocare, ejusq; administrationem, ne vi, nec cædibus, sed jure inter se experiantur Cives ejus, ad antiquum usum reducere queat ac valeat. Hisce saluberrimis Consilijs si Rempublicam favere intelligimus, Nos, ijs feliciter peractis, quorum gratiâ huc accessimus, sine ulla mora ac impensarum exactione, Exercitum Nostrum ex finibus Reipublicæ parati erimus reducere, aut, pacto foedere, si ita visum fuerit, in eam plagam convertere, unde utriq; Regno emolumentum accrescat. Hanc addimus conditionem, ut annona pro Exercitu Nostro transituro, vel consistente, tam diu concedatur & comportetur, ne Miles ad com meatum capiendum necessitatem habeat excurrendi, atq; adeo ob exactiones querimonijs ansam præbeat. Quâ ordinatione factâ, pro modestia Militis Nostri, qui summâ disciplinâ & severissimis mandatis Nostri coërcitus est, spondere non dubitamus. In quorum omnium pleniorum fidem, præsentibus hæc manu Nostra subscriptas, Sigillo Nostro Regio muniri jussimus. Dabantur ad Onoroviam die 16 Maij Anno Domini 1702.

Carolus



BIBLIOTHECA
VNIV. IAGELL.
GRACOVENSIS